



ル 5  
3079  
1





蜀中名勝記



門 5  
號 3079  
卷 1



昭和十三年  
七月十一日  
購求

蜀中名勝記序  
與精文其中載其采嘉  
遊蜀者不必其入山水也舟車所至雲烟  
朝暮竹栢陰晴凡高者皆可以爲山深者  
皆可以爲水也遊蜀山水者不必其山水  
之勝也舟車所至時有眺聽林泉眾獨猿  
鳥<sup>忻</sup>愉凡爲山者皆可以高爲水者皆可以  
深也一切高深可以爲山水而山水反不  
能自爲勝一切山水可以高深而山水之

蜀中名勝記  
序



勝反不能自爲名山水者有待而名勝者也曰事曰詩曰文之三者山水之眼也而蜀爲甚吾友曹能始仕蜀頗久所著有蜀中廣記問其目爲通釋爲風俗爲方物爲著作爲仙釋爲詩話爲畫苑爲宦游爲邊防爲名勝諸種子獨愛其名勝記體例之奇其書借郡邑爲規而內山水其中借山水爲規而內事與詩文其中擇其柔嘉擷

其深秀成一家言林茂之貧士也好其書刻之白門予序焉辟之奕郡邑其局也山水局中之道也事與詩文道上子也能始縱橫取予極穿插出沒之變則下子之人也古今以文字爲山水名勝者非作則述取能始之慧心不難於作其博識亦不難於述唯是以作者之才爲述者之事以述者之跡寄作者之心使古人事辭從吾心



手而事辭之出自古人者其面目又不失焉於是乎古人若有所不敢盡出其面目以讓能始爲述者地能始有所不敢盡出其心手以與古人之精神俱化爲山水之精神使山水文字不作兩事好之者不作兩人入無所不取取無所不得則經緯開合其中一往深心真有出乎述作之外者矣雖謂能始之記以蜀名勝生而仍以名

勝乎蜀可也

萬曆戊午嘉平月景陸友弟鍾惺撰



萬習為千嘉平民  
烈平蜀河出

蜀中名勝記卷之一

閩中曹學佺能始著

川西道

成都府一

成都華陽二縣附郭

華陽國志蜀之為國肇於人皇與巴同囿至黃帝為其子昌意娶蜀山氏之女生子高陽是為帝嚳封其支庶於蜀世為侯伯歷夏商周武王伐紂蜀人與焉尚書牧誓庸蜀羌髳是也有周之世限以秦巴雖奉王職不得與春秋盟會君長莫同書軌周失綱紀蜀先稱王有蜀侯蠶叢其目縱始稱王次王曰柏灌次



王曰魚鳧又次後有王曰杜宇始稱帝號曰望帝更名蒲卑治郫邑或治瞿上後傳位于其相開明開明位號曰叢帝叢帝生盧帝盧帝生保子帝九世始傳開明帝焉開明帝自夢廓移乃徙治成都揚雄蜀本紀云蜀王據有巴蜀之地本治廣都樊鄉徙居成都者也巴與蜀讐求救于秦秦惠王二十七年遣張儀與司馬錯等滅蜀遂置蜀郡儀築成都以象咸陽修整里闐市張列肆規制廣備故左思蜀都賦云金城石郭兼而中區旣麗且崇實號成都其地東接於巴南接於越北接於秦西奄峩嶓地稱天府原曰華

陽漢武帝元朔二年以新啓犍爲牂柯越雋三郡疆壤益廣始稱益州初治廣漢之雒縣後乃徙此李固與弟固書曰固今年五十七鬢髮已白所謂容身而遊滿腹而去周觀天下獨未見益州耳昔嚴夫子常言經有五涉其四州有九遊其八欲類此子矣王莽篡盜改天下郡守爲率正又改蜀郡爲導江遷公孫述爲導江率正治臨邛後據成都稱帝具置百官造十層赤樓東觀漢記曰公孫述造十層赤樓也于是改益州爲司隸蜀郡爲成都尹矣建武光復二百餘載迄今孝靈王室多故劉焉求益州牧以避世難始



治綿竹後徙成都先主代劉璋而有之卽位于武擔之南典略曰立德於是起館舍築亭障從成都至白水關四百餘區也後主建興二年以丞相亮開府領益州牧亮卒拜尙書令蔣琬爲大將軍領益州刺史蜀亡晉太康初乃屬王國號曰成都內史永嘉之難沒於夷獠成都記云府治北三里許有李特所築赤塗城十六國春秋曰李雄定成都以嚴禋爲蜀郡太守及卽位遷禋益州刺史是矣桓温西伐李勢出降劉義慶世說云宣武平蜀集參僚置酒於李勢殿巴蜀縉紳莫不來萃桓旣素有雄情爽氣加爾日音調

英發敍古今成敗由人存亡所繫其狀磊落一坐歎賞焉永和之際周撫爲蜀郡太守四十餘年境土粗安王逸少與周益州書云省足下別疏具彼土山川諸奇揚雄蜀都左太冲三都殊爲不備悉彼故爲多奇益令其遊日意足也可得果當告鄉求迎少入足耳至時示意遲此期眞以日爲歲但言此心已馳於彼矣又云吾有七兒惟一小者未婚過此便得至彼得果此緣一段奇事也梁武陵王始封入蜀元帝與之書云蜀中斗絕易動難安弟可鎮之吾自當滅賊又別紙云地擬孫劉各安竟界情深魯衛書信常通



良所託重也蕭紀反戈東下以地降於西魏再折入周室隋開皇始定之封其子秀作鎮於茲營侈宮室成都記曰隋蜀王秀嘗造一殿飛鳥不止其上此其凡耳後竟被徵唐初開國太宗以秦王建益州臺遙領之而已貞觀十年分成都縣之東偏置蜀縣在郭下明皇西幸駐蹕成都始改蜀縣爲華陽而成都華陽二縣從此分矣按今成華二縣與蜀邸護衛尺籍繡錯不能細爲分析大較西門者屬成都東門者屬華陽而南北門則成都有三分之二華陽居其一焉予觀揚子雲荅劉子駿書有少時所作成都城四

隅銘則今之東西南北四門頗爲近古西門者古之宣明門也南門者古之江橋門也東門者古陽城門北門者古咸陽門也李膺益州記云最東曰陽城門次西曰宣明門秦時張儀樓卽宣明門樓也重閣複道跨陽城門故太冲賦云結陽城之延閣飛觀榭乎雲中江橋者大江水所經也稍西爲市橋曰市橋門以漢舊州市在此橋南橋下卽石犀所潛淵亦曰石牛門故曰少城南面有三門焉咸陽門者秦惠王二十五年蜀侯惲賜死封其子綰爲蜀侯初蜀人葬惲郭外綰聞惲無罪乃使使迎喪入葬之郭內喪車



至城北門忽陷入地中蜀人因名北門曰咸陽門矣  
成都縣本治赤里街秦守張若徙入少城內少城  
者子城也惟西南北三壁東即大城之西墉故蜀都  
賦云亞以少城接於其西 周地圖記云初張儀築  
城城屢壞不能立忽有大龜出於江周行旋走巫言  
依龜行處築之城乃得立所掘處成大池龜乃伏於  
中龜每出則州境有賊刺史或病即此城也漢元鼎  
二年大城立九門少城立九門故有十八郭之稱而  
郡縣多城觀矣 大城者今南門城也李石詩序云  
張儀司馬錯所築大城自秦惠公乙巳歲至紹興壬

午一千四百七十八年雖頽圯所存如斷壁峭立亦  
學舍一奇觀云學舍在南則大城可知矣 少城者  
西南之間今之錦江樓也古今集記錦樓在龜城上  
前臨大江下瞰井邑西眺雪嶺東望長松白敏中嘗  
賦詩於其上舊紀謂路巖所建非也巖在敏中之後  
矣范成大詩註云少城張儀所築子城也土甚堅橫  
木皆朽有穿眼土坦着不散予按王右軍法帖往  
在都見諸葛允曾問蜀中事云成都城門屋樓觀  
皆是秦時司馬錯所修令人遠想慨然具示爲廣異  
聞 華陽國志張儀張若城成都周迴十二里高七



尺造作下倉上皆有屋而置觀樓射圃又營廣府舍  
置鹽鐵市官并長丞皆與咸陽同制更於夷里橋南  
立錦官錦官者猶合浦之有珠官也西又有車官城  
其城東西南北皆有軍營壘城焉按此皆從西南隅  
論耳蜀漢昭烈卽位於武擔之南當在城之正中今  
蜀藩是也隋之摩訶池僞蜀之宣華苑皆在其內昔  
諸葛武侯以丞相開府領益州牧故晉益州刺史治  
太城其制因之亦唐節度使宋制置使所稱建牙交  
戟地矣蜀太守治少城故昔之郡治因焉西門直街  
鼓樓卽宋銅壺閣也陸游記云閣南直西川門西北

距府五十步乃蔣堂知益州伐江瀆廟材所創吳棫  
范成大相繼而侈張之爲成都巨觀書於史又吳師  
孟修西樓記云西樓直府寢之北每春月花時大帥  
置酒高會參佐於其下五日復縱民遊觀宴嬉西園  
以爲歲事然止得造其廡序而已合此二說則府治  
爲西門無疑相沿蜀郡太守之故址也今乃益遜而  
北蓋不敢與藩邸抗於是斥北城之地以居故武擔  
山昔在城外而今在城內陸務觀有游武擔村落詩  
可證矣轉運使今之藩司也鈐轄使今之閫司也運  
司昔在城東有玉溪堂卽僞蜀權臣故宅今藩司在



城北闔司相沿如故若提刑漕使卽今之守巡使者散在諸路是其職居位置皆有不同如此南門之勝如石室石犀巖真觀江瀆池七星橋昭烈武侯祠其最著者華陽國志云始文翁立文學精舍講堂作石室一作玉室在城南永初後堂遇火太守陳留高朕更修立又增造二石室李知幾云西爲文翁稍南爲高朕比文翁石室差大皆有石像矣樂史寰宇記云文翁學堂一名周公禮殿方輿勝覽云前代以周公爲先聖至唐貞觀始從房玄齡等議更祀孔子開元冊諡文宣王位南嚮自是號文宣王殿矣而周

公之祀遂廢然舊像猶存後袁說友乃爲殿祀之按上南志以武侯征西南夷而夢見周公故勅所在祀周公也任豫益州記云禮殿其欒櫨節制猶古建南基高六尺厦屋三間通皆圖畫古人之像及禮器瑞物堂西有二石室繫年錄云紹興六年成都教授范仲爰奏疏言本府學殿建於東漢之初平漢人以大隸記其修築歲月刻於東楹至今九百四十三年蓋天下棟宇之古無過於此者按歐陽修集古錄以周公禮殿記蔡邕所書也范鎮云其柱鍾會隸書刻其上李知幾十詠詩說會與鄧艾同入蜀在咸熙二年



甲申距漢獻興平元年甲戌凡七十一年矣會蓋追文翁高君之美而書也趙明誠金石錄跋云右漢周公禮殿記者今成都府學有漢時所建舊屋柱皆正方上狹下闊此記刻在柱上靈帝初平五年立距今蓋千年矣而字畫完好可讀當時石刻在者往往磨滅此記託於廡楹乃與金石爭壽亦異矣記有云甲午年故府梓潼文君增造吏舍二百餘間按華陽國志有文齊字子奇梓潼人平帝用爲益州太守不從王莽公孫述光武嘉之疑此記所載卽其人也蓋光武建武十年歲次甲午云 唐盧照鄰文翁講堂詩

錦里淹中館岷山稷下亭空梁無燕雀古壁有丹青  
槐落猶疑市苔深不辨銘良哉二千石江漢表遺靈  
豈復全豐碑文字滅冥漠不知年裴鏹詩文翁石室  
有儀刑庠序千秋播德馨古柏尙留今日翠高岷猶  
藹舊時青人心未肯拋羶蟻弟子依前學聚螢更歎  
沱江無限水爭流祇願到滄溟宋李石詩來爲人所  
愛去爲人所思君看文與高慈惠蜀之師至今室中  
像凜凜建立時知非伯有室定是桐鄉祠蜀人愛二  
公遠與千載期宋京蜀事補亡詩君不見西漢文翁



爲蜀守蜀學不居齊魯後諸生競欲保翁名石室鐫磨貴難朽東漢高公又幾時爲作石室還如茲至今二室堅且久文公高公名不衰喻汝礪謁文翁堂詩綠荻負幽隱高槐泛輕涼各誇一時好披風互低昂詎知五月中微陰忽催黃我行魯侯宮獨謁文翁堂若人骨已朽道在斯不亡遂令蜀文章照耀日月傍世事俱腐臭斯文真久長靡頽能幾時蕭條翳墟荒富貴豈不好千載同一傷三歎爲何人撫己涕自滂

寰宇記云石室司馬相如教授於此從者數千人按秦宓引地理志文翁倡其教相如爲之師漢家得

士盛於其世 金石錄云石室又有左右生題名碑或云江陽甯蜀遂甯晉原以晉志攷之江陽蜀漢置此郡甯蜀遂甯晉原皆是宣武平蜀後置范蜀公云西漢時諸生姓名文學祭酒典學從事各一人司儀主事各一人左生七十三人右生三十人可攷者僅百許人按集古錄謂爲晉宋間碑 王象之輿地碑目云大周總管太學碑益州刺史齊國公宇文憲立益州州學廟堂頌唐神龍二年史燾撰益州館學廟堂記永徽元年賀公亮撰益州孔子廟堂碑開元中周灝撰唐明皇追謚孔子冊文宋太平興國五年府



尹辛仲南立石又云石室贊大厯十年維州刺史鄭藏休撰殿中侍御史李樞篆益州文宣王廟碣會昌五年裴坦撰趙明誠唐益州學館廟堂記跋云成都縣令顏有意書撰人題法曹陳玉文學太子詹事待詔宏文館陵州長史而姓名殘缺不可辨集古錄直以爲有意撰非也碑陰載當時官僚姓名後人題云此記賀公亮撰未知果否繫年錄云宋高宗皇帝御書大成殿榜紹興六年賜成都府學從教授范仲受所請也成都記云僞蜀孟昶有國其相母昭裔刻孝經論語爾雅周易尙書周禮毛詩禮記儀禮左傳凡

十經於石其書丹則張德釗楊鈞張紹文孫逢吉朋吉周德貞也石凡千數盡依太和舊本厯八年乃成公穀則有宋田元均所刻古文尙書則晁公武所補也胡元質宗愈作堂以貯之名石經堂在府學按已上諸刻今皆不存所存者孔門七十二子像又近時摹宋本而刻者人物衣褶差有古意石經禮記數段流落在合州賓館中李陽冰篆書之碑陰予友范汭見而爲予言之 石犀寺一名石牛寺華陽國志周顯王之世蜀王有褒漢之地因獵谷中與秦惠王遇惠王以金二笥遺蜀王王報以珍玩之物物化爲土



惠王怒羣臣賀曰天奉我矣王將得蜀土地惠王喜乃作石牛五頭朝瀉金其後曰牛便金有養卒百人蜀人悅之使使請石牛惠王許之乃遣五丁迎石牛既不便金怒遣還之乃嘲秦人曰東方牧犢兒秦人笑之曰吾雖牧犢當得蜀也輿地志云鄧艾廟南有石牛卽秦惠王遺蜀王者水經註西南石牛門曰市橋吳漢入蜀自廣都令輕騎先往焚之橋下謂之石犀淵李冰昔作石犀五頭以厭水精穿石犀渠於江南命曰犀牛里後轉置犀牛二頭一頭在府市市橋門一頭沈之于淵也今寺正殿階左有石蹲處狀若

犀然額曰聖壽寺古之龍淵寺也迺晉王羽宅後捨爲寺改名龍淵佛殿有水眼如井云與海通高僧傳晉惠特到蜀止金淵精舍是矣其後改名空慧隋賜蜀王秀竹園六十頃此地屬焉唐儀鳳二年勅天下七寺建塔立石柱二度僧嘗七百人此其一也會昌中廢至大中元年李回重建摹萬里橋南元和聖壽寺額豎此故曰聖壽寺字則僖宗御書也寺有尊勝咒石幢高七尺圍四尺太和中馬季武行書我明嘉靖中掘地得之唐岑參石犀詩江水初蕩潏蜀人幾爲魚向無爾石犀安得有邑居始知李太守伯禹



亦不如杜甫石犀行君不見秦時蜀太守刻石立作  
三犀牛自古雖有厭勝法天生江水向東流蜀人矜  
誇一千載泛溢不近張儀樓今年灌口損戶口此事  
或恐爲神羞終藉隄防出眾力高擁木石當清秋  
益州記曰鴈橋東有嚴君平卜處二臺高數丈祝穆  
方輿勝覽云龜城水中出金雁因謂之雁橋也錦里  
耆舊傳曰嚴君平宅卜肆之井猶存今爲嚴真觀道  
教靈驗記云成都卜肆支機石卽海客攜來自天河  
所得織女令問嚴君平者也太尉燉煌公好奇尙異  
命工人鐫取支機一片欲爲器用椎琢之際忽若風

霧墜於石側如此者三公知其靈物乃已之至今所  
刻之迹在焉復令穿掘其下則風雷震驚咫尺昏瞠  
遂不敢犯唐張九齡送姚評事入蜀賦得卜肆詩云  
蜀巖化已久沈冥空所思嘗聞賣卜處猶憶下簾時  
驅傳應經此懷賢儻問之歸來說往事歷歷偶心期  
岑參卜肆詩君平曾賣卜卜肆蕪已久至今杖頭錢  
時時地上有不知支機石還在人闕否蕭德言君平  
古井詩嚴平本高尚遠蹈古人風賣卜成都市流名  
大漢中舊井改人世寒泉久不通年多旣罷汲無禽  
乃遂空如何屬秋氣惟見落雙桐宋呂光弼詩卜肆



蜀中名勝記 卷之一  
垂簾地依然門徑開沈冥時已往思慕客猶來鳥啄  
虛簷壞狐穿古井摧空餘舊機石歲歲長春苔喻汝  
礪游巖真觀見壁上有記古鼎丹砂事因述以詩云  
古木共幽意長廊亦肅如於焉步逍遙且復散衣裾  
塵慮颯已空道心頗閑舒不知度世人去此歲幾徂  
云何有丹砂尙爾留庭隅支機亦悠哉誰復訂有無  
我知此公意慨彼元鼎初繼之五鳳間斯民斃刀鋸  
聊欲謝世網歛以道自娛抱理猶自會曠懷遺所拘  
初匪逃世人而世自我疎含默念斯理起我憂患餘  
宋京補亡詩云君不見莊遵賣卜成都市市中仙隱

無人值百錢度日復何求猶有沈冥見文字不因問  
着牛女星下世安能知姓名雲中雞犬拔家去舊宅  
寂寞秋蕪平堵機石在年年長藥鼎空留閉黃壤前  
時發掘篆籀新明水神丹光滉漾金雁橋邊臺觀存  
神仙遺事渺難論安得先生爲我卜俗骨庶可窺天  
闔 括地志云江瀆祠在成都縣南上四里漢郊祀  
志云秦并天下立江水祠於蜀至今歲祀之按廣雅  
江神謂之奇相江記云帝女也卒爲江神 漢舊儀  
云祭四瀆用三牲圭沈有車馬紺蓋以夏之日觴焉  
按陸游江瀆廟碑云成都自唐有江瀆廟其南臨江



及後節度使高駢大城成都廟與江始隔馮浩設廳  
記云廟前臨清池有鳥嶼竹木之勝紅葉夏發水碧  
四照爲一州之觀田况成都遊樂詩伏日宴江瀆祠  
避暑因遊江瀆池此會起於文潞公也宋祁集江瀆  
池詩云五月追涼地滄江剩素漣林煙昏岸日樓影  
壓池天篠密工迷徑荷欹巧避船機忘更何事魚鳥  
亦留連又飛檻枕溪光歡言客徧觴暫雲銷樹影驟  
雨發荷香辛白橙蒸熟庖刀鱠縷長蘋風如有意盈  
衽借浮涼又溪淺容篙短舟移覺岸長烟稠芰荷葉  
霞熟荔支房技疊三搗鼓杯寒十饋漿便成逃暑醉

官事底相妨又九月十日宴江瀆亭詩節去歡猶在  
賓來賞更延悠揚初短日淒緊乍寒天霽照元非漲  
秋花自少妍蟻留新獻耐蕙續不殘烟戲鰓衝餘藻  
游龜避折蓮流芳眞可惜從此遂凋年 華陽國志  
云蜀江眾多作橋故蜀立里多以橋爲名西南兩江  
有七橋直西門郾江中冲治橋西南石牛門曰市橋  
城南曰江橋南渡流曰萬里橋西上曰夷里橋上曰  
竿橋橋從冲治橋西出折曰長昇橋揚雄蜀記云星  
橋上應七星也李冰所造按七星橋者一長星橋今  
名萬里二員星橋今名安樂三璣星橋今名建昌四



夷星橋今名竿橋五尾星橋今名禪尼六冲星橋今  
名永平七曲星橋今名昇仙此李膺所記矣今南門  
江洲中有金沙寺其處俗呼爲七星灘也後漢書世  
祖謂吳漢曰安軍宜在七橋連星間按漢自廣都乘  
勝進逼成都與其副劉尚南北相望夾江爲營浮橋  
相對公孫述使謝豐揚軍市橋出漢後襲破漢墜馬  
落水緣馬尾得出入壁命將夜潛渡江就尙繫豐斬  
之於是水之陰焉今正南門外者乃江橋耳水經注  
云南江橋亦曰安樂橋在城南二十五步宋孝武以  
橋爲安樂寺改名安樂橋十六國春秋李特將起童

謠云江頭橋闕下李成都北門十八子卽此橋也南  
上爲萬里橋亦名篤泉橋橋之南有篤泉矣蜀使費  
禕聘吳丞相亮祖之歎曰萬里之行始於今日故曰  
萬里橋唐岑參萬里橋詩成都與維揚相去萬里地  
滄江東流疾帆去如鳥翅楚客過此橋東看盡垂淚  
江都陸肱賦云萬里兮蜀郡隋都二橋兮地角天隅  
東土爲揚西邦曰益架長虹於兩地客思迢迢浩積  
水於千秋江流脈脈結構應似途程甚偏飾丹雘以  
雖同彼臨淮海度軒車而旣易此對銅梁正用揚益  
相望事也 寰宇記云惠陵蜀先主陵也今有祠存



蜀中名勝記 卷之一  
號曰惠陵祠周地圖云先主祠在府西南八里惠陵  
東七十步齊高帝夢益州有天子鹵簿詔刺史傅覃  
修立而規制卑小至唐相國李回在鎮更改置守陵  
戶四時祭祀岑參先主廟詩先主與武侯相逢雲雷  
際感通君臣分義激魚水契遺廟空蕭然英靈貫千  
歲張儼詩雄名垂竹帛荒陵壓阡陌終古更何聞悲  
風入松柏劉夢得詩天地英雄氣千秋尙凜然勢分  
三足鼎業復五銖錢得相能開國生兒不象賢淒涼  
蜀故妓來舞魏宮前宋晁迥詩天地收霸氣邱原餘  
闕宮野人相指似旁有若唐封當時大耳兒甚似隆

準公夫豈忘故都崎嶇巴蜀中劃然成三分正爾扼  
兩雄武侯抱遺恨秦隴竟莫通獨憐晉昌明千載時  
始逢坐看五胡亂蕭條河洛空碑目云先主廟碑貞  
元四年蘇端撰又云昭烈廟有裴中立武侯碑柳公  
綽書今存又有段尹石爲樵者敲斷陳薦作詩紀之  
又有臨淮公武元衡碑楊嗣復祠祭畢觀碑感舊有  
作寄楊汝士和焉按元和初元衡鎮蜀中立爲節度  
推官汝士先亦曾作文昌掌管也西陽雜俎成都有  
唐平南蠻碑開元十九年劍南節度副大史張敬忠  
所立時南蠻大酋長樂浪州刺史楊盛顛爲邊患明



皇遣內常侍高守信爲南道招慰處置使以討之拔其九城此事新舊唐書及野史皆不載按碑目以此爲蕭晉用撰在昭烈廟中矣 能改齋漫錄蜀先主祠在成都錦官門外西夾卽武侯祠東夾卽後主祠蔣公堂帥蜀以禪不能保有土宇因去之大慈寺有蜀後主王衍銅像程公堂繼帥毀以鑄鐘蜀語曰任是兩王難當二堂樂史云關侯張飛祠俱在惠陵左右宋廬陵王立按今昭烈祠左右侍側者後主北地主王謙諸葛丞相亮亮子瞻及關張兩侯俱合爲一祠也蜀志國降之日北地主王謙率其官屬哭於先主廟

以妻子自焚是矣酉陽雜俎云近有羣盜發蜀先主墓入穴見兩人張燈對奕侍衛十餘盜驚懼拜謝一人顧曰爾飲乎乃各飲以一杯兼乞與玉腰帶數條命速出盜至外口已漆矣帶乃巨蛇也視其穴已如舊成都記云蜀先主祠旁有獠村其民皆剔髮事浮屠而畜妻子自如及李德裕下令嚴禁乃肅如也方輿勝覽云武侯廟在府西南二里今爲乘煙觀孔明表云薄田十頃桑八百株卽此地孔明初亡百姓遇節朔各私祭於道上李雄稱王始爲廟於少城內桓温平蜀夷少城獨存孔明廟後封武興王廟至今



祠祀不絕寰宇記云諸葛亮相蜀築臺以集諸儒兼  
待四方賢士號曰讀書臺在章城門路西今爲乘煙  
觀杜光庭錄異記云成都書臺坊武侯宅南乘煙觀  
內有古井井內有魚長六七寸往往游於井上水必  
騰涌相傳其井有龍矣杜甫詩丞相祠堂何處尋錦  
官城外柏森森映階碧草自春色隔葉黃鸝空好音  
三顧頻煩天下計兩朝開濟老臣心出師未捷身先  
死長使英雄淚滿襟武少儀詩執簡焚香入廟門武  
侯神像儼如存因機定蜀延衰漢以計連吳振弱孫  
欲盡智能傾僭盜善持忠節輔庸昏宣王請戰貽巾

輟始見才吞亦氣吞楊汝士詩古柏森然地修嚴蜀  
相祠一過榮異代三顧盛當時功德流何遠馨香薦  
未衰敬名探國志飾像慰毗思昔謁從征蓋今聞擁  
信旗固宜光寵下有淚刻前碑陳薦詩建安綱紀如  
綫微高光基業春冰危姦豪拔劍將羣盜驅龍控虎  
爭雄雌武侯當日臥南陽韜稜晦角陰營爲高吟梁  
甫比管樂胸中造化無人知東吳北魏至強大不肯  
逆德爲其師先主歎聞元直語三往咨求當世宜勤  
勤陳說扶漢室慷慨感義許驅馳一說孫權敗曹操  
劉氏遂肇中興基申明號令鼓雷電勸勵士卒獮蛟



蜀中名勝記 卷之一  
螭分留猛將控荆渚翼載昭烈來坤維獻皇邁害首  
勸進應天嗣位開羣疑本謀憑藉蜀富庶養威用作  
并吞資大勳未集昭烈崩遵守顧命如周伊均平賞  
罰重恩信比屋道路皆熙熙七擒孟獲除後患至今  
南詔崇靈祠東征直據五丈原欲復咸鎬緩華夷上  
成先帝創業意下副四海蒼生思推忠仗順氣百倍  
俯視敵眾真嬰兒流星落帳芒角惡暴然不起軍如  
癡仲達雖走禪終虜人謀不可違天時精魂埋沒已  
千歲奈無英傑齊高規朔方男子過廟下秋天寥落  
霜風悲林梢脫葉響颯颯墓頭煙雨寒絲絲妖狐怪

兔穴壤壁饑鴟餓鵲啼枯枝樵兒敲斷段尹石苔蘚  
爛斑裴相碑手植勁柏尙蒼翠疑有神靈潛護持睟  
容昏剝堂廡陋龍祠神廟窮珍奇吾心切切慕風槩  
灑淚踟躕成此詩宋京詩云君不見孔明書臺遺廟  
旁古書不見臺荒涼臥龍未起蜀天遠茅廬日日空  
南陽赤符光寒白水涸秣陵王氣猶能作璋若嬰兒  
操虎狼脫去荊州殊不惡十倍奇才安用書此臺昔  
時知有無蜀人思君識故處未若江水存兵圖黃冠  
所居門第改祗有坊名今尙在安得臺邊見古人秋  
草重生類書帶蜀古蹟記云宋曹彬建隆二年爲都



蜀中名勝記卷之二  
監代蜀謁武侯祠視宇第雄觀頗有不平謂左右曰  
孔明雖忠於漢然疲竭蜀之軍民不能復中原萬一  
何得爲武當因其頽敗者折去之止留其中以祀香  
火左右皆諫不可俄報中殿摧塌有石碑出土尺許  
彬逕視之其刻字宛若新書題云測吾心腹事惟有  
宋曹彬讀訖下拜曰公神人也小子安能窺測哉遂  
令蜀守新其祠宇爲文祀之而去按此古昔武侯祠  
也天杜任淵記云昭烈廟西偏少南又有別廟忠武  
侯在焉老柏參天氣象甚古詩人嘗爲賦之是矣今  
武侯祠在百花潭與草堂並列者不知何代增設

蜀中名勝記卷之二

閩中曹學佺能始著

成都府二

西門之勝張儀樓石筍街竿橋琴臺浣花溪青羊宮  
淨眾寺少陵草堂其最著者 任豫益州記曰諸樓  
年代旣久榱棟非昔惟西門一樓雖有補葺張儀時  
舊跡猶存古今集記云張儀樓高百尺初張儀築城  
雖因神龜然亦順江山之形以城勢稍偏故作樓以  
定南北李膺記曰成都有百尺樓後名爲白菟樓也  
晉張載登成都白菟樓詩重城結曲阿飛宇起層樓



累棟出雲表，曉巖臨太虛。高軒啓朱扉，迴望暢八隅。  
西瞻岷山嶺，嵯峩似荆巫。蹲鴟蔽地生，原隰殖嘉蔬。  
雖遇堯湯世，民食恆有餘。鬱鬱少城中，岌岌百族居。  
街術紛綺錯，高營夾長衢。借問揚子宅，想見長卿廬。  
程卓累千金，驕奢擬五侯。門有連騎客，翠帶腰吳鉤。  
鼎食隨時進，百和妙且殊。披林採秋橘，臨江釣春魚。  
黑子過龍醢，果饌踰蟹蟪。芳茶冠六清，溢味播九區。  
人生苟安樂，茲土聊可娛。唐岑參張儀樓詩傳是秦  
時樓巍巍，至今在樓南。兩江水千古，長不改。曾聞昔  
時人歲月不相待，杜甫和嚴中丞西城晚眺詩云汲

黯匡君切廉頗，出將頻直辭。才不世，雄略動如神。政  
簡移風速，詩清立意新。層城臨暇景，絕域望餘春。旗  
尾蛟龍會，樓頭燕雀馴。地平江動蜀，天闊樹浮秦。帝  
念深分闔，軍須遠算緡。花羅封蛺蝶，瑞錦送麒麟。辭  
第輪高義，觀圖憶古人。征南多興緒，事業暗相親。段  
文昌，晚夏登張儀樓呈院中諸公詩。重樓窗戶開，四  
望斂煙埃。遠岫林端出，清波城下迴。乍疑蟬韻促，稍  
覺雪風來。併起鄉關思，銷憂在酒盃。姚向和云。秦相  
架羣才，登臨契上台。查從銀漢落，江自雪山來。儷曲  
親流火，凌風洽小杯。帝鄉如在目，欲下盡徘徊。温會



蜀中雜記 卷之二  
和云危軒重疊開訪古上徘徊有舌嗟秦策飛梁認  
楚材雲霄隨鳳到物象爲詩來欲和關山意巴歌調  
更哀揚汝士和云從公城上來秋近絕纖埃樓古秦  
規在江分蜀望開遠山標宿雪末席接寒灰陪賞今  
爲忝臨歡敢訴杯李伯敬和云層屋架城隈賓筵此  
日開文鋒摧入韻星分應三台望雪煩襟釋當歡遠  
思來披雲霄漢近覺出塵埃姚康和云登覽值晴  
開詩從野思來蜀川新草木秦日舊樓臺池影搖中  
座山光接上台近秋宜晚景極目斷浮埃 石經始  
末云錦官西樓有胡元質所鑿石經數板蓋公得五

代時墜刻于一二故家殘圭裂璧亦可寶也凡蔡中  
郎石經四千二百七十字有奇及古文篆隸三體石  
經遺字八百一十九黃山谷跋張熙書卷尾云蘭  
亭楔飲詩敘二本前一本是都下人家用定武舊石  
刻摹入木板者一本以門下蘇侍郎所藏唐人臨寫  
墨跡刻之成都西樓下有數字極瘦勁不凡東坡謂  
此本乃絕倫也陸游跋東坡書髓帖云成都西樓下  
石刻東坡法帖十卷擇其尤奇逸者爲一編號東坡  
書髓三十年間未嘗釋手去歲都下脫敗甚乃再裝  
緝之嘉泰三年歲在癸亥九月三日老學菴北窗手



蜀中名勝記 卷之二 三  
記 常璩云蜀有五丁力士能移山舉萬鈞每王薨輒立大石長三丈重千鈞爲墓志今石笋是也號曰笋里寰宇記云武擔石俗曰石笋在州城西門大街中益部耆舊傳云公孫述時武擔石折任文公歎曰西方智士死吾當應之歲中卒庾信演連珠云竹杖扶危不能正武擔之石 通志云雙石笋在興義門內卽眞珠樓基也按西門王建武成謂之興義門李膺記云開明氏造七寶樓以珍珠爲簾其後蜀郡火民家數千與七寶樓俱燬趙清獻記曰眞珠樓基在石笋街一說有大秦胡於其地起寺門樓十間皆

飾以眞珠翠碧貫之如簾寺卽大秦寺也老杜石笋行君不見益州城西門陌上石笋雙高蹲古來相傳是海眼苔蘚蝕盡波濤痕雨多往往得瑟瑟此事恍惚難明論註云成都子城西金容坊有石二株挺然聳峭高丈餘耆舊傳云其名有六曰石笋曰蜀妃闕曰沈犀石曰魚鳧仙壇曰四海之眼曰五丁石門皆非也圖經云乃前寺之遺址諸葛亮掘之方驗有篆字曰蠶叢氏啓國誓蜀之碑以二石柱橫埋連接鐵其中一南一北無所偏邪上有濁歎燭觸蠲五字時人莫曉蜀相范賢議曰亥子歲濁字可記主水災寅



卯歲歎字可記主饑饉巳午歲燭字可記主火災辰  
戌歲觸字可記主兵災申酉歲蠲字可記主稼穡富  
贍悉以年事推應符響矣 徐康晉記桓温伐蜀戰  
于笮橋參軍襲護戰沒眾欲退而鼓吏誤鳴進鼓於  
是乘之遂入少城寰宇記云笮橋去州西四里名夷  
里橋以竹索爲之因名笮橋李膺笮橋贊云復引一  
索飛絙杙閣其名曰笮人懸半空度彼絕壑 益州  
記曰市橋笮橋今各有一鐵椎大十許圍長六七十  
尺云初營橋引機運此椎以繫橋柱本有三今餘二  
南史宋大始初益州笮橋忽生一洲道士柳石見之

曰當有貴王臨州必有王勝喜也及齊永明二年武  
帝遣始興王爲益州勝喜者卽始興反語蜀古蹟記  
曰笮橋邊有二石闕乃漢趙典墓 王褒益州記  
曰司馬相如宅在州笮橋北百步許李膺云市橋西  
二百步得相如舊宅今海安寺南有琴臺故墟方輿  
勝覽云琴臺後爲金花寺城內者非其舊也金花寺  
以晉胡僧持金花玉像住此故名按卽今之金泉鋪  
矣梁簡文登琴臺詩蕪階踐昔徑復想鳴琴遊音容  
萬春罷高名千載留弱枝生古樹舊石染新流由來  
遞相歎逝川終不收唐盧照隣相如琴臺詩聞有雍



容地千年無四隣園院風煙古池臺松檟春雲疑作  
賦客月似聽琴人寂寂啼鶯處空傷遊子神杜甫詩  
茂陵多病後尙愛卓文君酒肆人間世琴臺日暮雲  
野花留寶靨蔓草見羅裙歸鳳求凰意寥寥不復聞  
高適同羣公秋登琴臺詩古跡使人感琴臺空寂寥  
靜然顧遺塵千載如昨朝臨眺自茲始羣賢久相邀  
德與形神高孰知天地遙四時何倏忽六月鳴秋蜩  
萬象歸白帝平川橫赤霄猶是對夏伏幾時有涼焱  
燕雀滿檐楹鴻鵠搏扶搖物性各自得我心在漁樵  
兀然還復醉尙握樽中瓢岑參詩相如琴臺古人去

臺亦空臺上寒蕭條至今多悲風荒臺漢時月色與  
舊時同宋呂公弼詩煙樹重城側琴臺千古餘早爲  
梁苑客晚向茂陵居賦給尙書筆歸乘使者車清風  
靚舊隱長日聳鄉閭宋祁詩故臺千古恨猶對舊家  
山半夜鸞鳳去他年駟馬還死憂封禪晚生愛茂陵  
間惟有飄飄氣仍存天地間 歲華紀麗云正月念  
八日出竿橋門卽拜保壽侯祠次詣淨眾寺拜杜邠  
公祠按杜邠公悰唐元和間帥蜀者又蘇明允集有  
張文公方平公祠碑記亦在淨眾寺 高僧傳云僧  
無相新羅國人開元十六年至成都募化檀越造淨



蜀中名勝記 卷之二  
眾寺影堂在焉寺有一巨鐘重千鈞會昌例毀此鐘  
乃移入大慈大中復還寺眾以其鐘大隔江計功兩  
日始到方欲爲齋辰去已集乃知神力所拽也相傳  
有塔號東海大師塔云唐鄭谷西蜀淨眾寺松溪入  
韻兼寄小華崔處士詩松因溪得名溪吹答松聲繚  
繞能穿寺幽奇不在城寒煙齋後散春雨夜中平染  
岸蒼苔古翹沙白鳥明澄分僧影瘦光徹客心清帶  
梵侵雲響和鐘擊石鳴淡烹新茗爽暖泛落花輕此  
景吟難盡憑君畫入京又淨眾寺雜題水詩竹院松  
廊分數派不空清泚亦透迤落花相逐去何處幽鳥

獨來無限時洗鉢老僧臨岸久釣魚閒客卷綸遲晚  
晴一片連莎綠悔與滄浪有舊期七祖院小山詩小  
巧功成雨蘚斑軒車日日扣松關峩眉咫尺無人去  
卻向僧窗看假山忍公小軒詩松溪水色綠于松每  
到松溪聽暮鐘閒得心源祗如此問禪何必向雙峯  
傳經院壁畫松詩危根瘦蓋聳孤峯珍重江僧好筆  
蹤得向游人多處畫卻勝澗底作真松李洞宿成都  
松溪院詩松持節操溪澄性一炷嵐煙壓寺隅翡翠  
鳥飛人不見琉璃瓶貯水疑無夜聞子落真山雨曉  
汲波圓入畫圖塵擁蜀城抽鎖後此中猶夢在江湖



宋范鎮淨眾寺新禪院詩金地西郊外一來煩念攄  
但逢是仙境鮮不蜀僧居岸綠見翹鷺溪清無隱魚  
殘陽已周覽欲去幾躊躇曰况正月二十八日謁生  
祿祠遊淨眾寺詩千騎出重闈嚴祠淨宇鄰映林沽  
酒旆迎馬獻花人豔日披江霧香飈起路塵韶華特  
明媚不似遠方春按淨眾寺宋改爲淨因寺今謂之  
萬佛寺也蜀本記云老子爲關令尹喜著道德經  
臨別曰子行道千日後于成都郡青羊肆尋吾今爲  
青羊觀也古今集記云老子乘青羊降其地有臺存  
觀中有白玉蟾書碑字徑半尺宋何耕詩云一再官

錦城咫尺望琳宮未始得得來正墮役役中今朝弄  
晴雨策蹇隨春風頗愛意象古停驂少從容縹緲百  
尺臺突起凌半空憑欄俯修竹决眚明孤鴻信哉神  
仙宅不受塵垢蒙稽首五千言眾妙一以通靜觀萬  
物復豈假九轉功區區立訓誥亦晒河上公癡人慕  
羽化心外求鴻濛要騎白鶴背往訪青羊蹤此詩刻  
石于臺前缺數字方輿勝覽云浣花溪在城西五  
里一名百花潭按吳中復冀國夫人任氏碑記云夫  
人微時以四月十九日見一僧墜污渠爲濯其衣頃  
刻百花滿潭因名曰百花潭按蜀志補遺浣花谿有



蜀中名勝記 卷之二  
石刻浣花夫人像三月三日爲夫人生辰傾城出遊  
成都記云夫人姓任氏崔甯之妾按通鑑成都節度  
使崔旰入朝楊子琳乘虛突入成都旰妾任氏出家  
財募兵得數千人自帥以擊之子琳敗走朝廷加旰  
尙書賜名甯任氏封夫人也蜀檣杙軋德五年四月  
十九日王衍出遊浣花溪龍舟綵舫十里綿緝自百  
花潭至于萬里橋遊人士女珠翠夾岸日方午暴風  
起須臾雷電晦冥有白魚自江心躍起騰空而去或  
云變爲蛟牛嶠李珣有浣花詞云昨日西溪遊賞芳  
樹奇花千樣鎖春光金罇滿聽絃管嬌妓舞衫香暖

不覺到斜暉馬馱歸又云訪舊傷離欲斷魂無因重  
見玉樓人六街微雨鏤香塵早爲不逢巫峽夢邨堪  
虛度錦江春遇花傾酒莫辭頻前調西溪子而後浣  
溪沙也宋祁浣花泛舟詩早夏清和在晴江汭沂時  
岸風搖鼓吹波日亂旌旗醉帶牽緇蔓游鬟撲絳蕤  
樹來驚浦進山失悟舟移雅俗西南盛歸輶東北馳  
此歡那復得拋恨寄天涯又春日遊浣花云側蓋天  
長蕩曠霏暖風才滿使君旗水通江渚容魚樂草徧  
山梁報雉時場雨滅塵盤馬疾樓雲礙日進觴遲少  
陵宅畔吟聲歇柳碧梅青欲向誰田况四月十九汎



蜀中名勝記 卷之二  
浣花谿詩浣花溪上春風後節物正宜行樂時十里  
綺羅青蓋密萬家歌吹綠楊垂畫船疊鼓臨芳潏綵  
閣凌波汎羽卮霞景漸曛歸權促滿城懽醉待旌旗  
馬備浣花谿詩浣花溪邊濯錦裳百花滿潭溪水香  
寶奩散盡買霜戟草林匹馬不可當當時濯衣只偶  
爾豈似取履張子房烈烈遽能蔽此蜀喪亂懷爾徒  
悲傷年年春風媚楊柳綵纜掩艸雲霞張溪邊遊冶  
紅粉娘了不識字空悠颺採花蕩漿不歸去暮隔煙  
水眠幽芳黃魯直浣花溪圖引云拾遺流落錦官城  
故人作尹眼爲青碧雞坊西結茅屋百花潭水潔冠

纓故衣未補新衣綻空蟠胸中書萬卷探道欲度羲  
皇前論詩未覺國風遠干戈崢嶸暗寓縣杜陵韋曲  
無雞犬老妻稚子宜眼前弟妹飄零不相見此心樂  
易真可人園翁溪友昔卜鄰鄰家有酒邀皆去得意  
魚鳥來相親浣花酒船散車騎野墻無主看桃李宗  
文守家宗武扶落日蹇驢馱醉起厭聞解鞍脫兜鍪  
老儒不用千戶侯中原未得平安報醉裏眉攢萬國  
愁生綃鋪墻粉墨落平生忠義公寂寞兒孫不蘇驢  
失腳猶恐醒來有新作常使詩人拜畫圖煎膠續絃  
千古無 杜甫卜居詩云浣花溪水西頭主人爲



登中名勝記 卷之二  
卜林塘幽已知出郭少塵事更有澄江銷客愁無數  
蜻蜓齊上下一雙鷓鴣對沈浮東行萬里堪乘興須  
向山陰上小舟此卽草堂也楊慎引文選注云蕭齊  
周允昔經在蜀以蜀草堂林壑可懷迺於鍾山雷次  
宗學館立寺因名草堂寺又云蜀人語草爲茨成都  
令周允旣歸金陵乃倣蜀草堂寺遺意於鍾山之麓  
築草堂亦曰山茨不忘蜀也可知蜀之草堂寺著名  
久矣子美依其地而卜築題詠日多不具錄其時軒  
蓋過從有嚴中丞仲夏枉駕草堂兼携酒饌得寒字  
作有王十七侍御掄許携酒至草堂奉寄詩便請邀

高三十五使君同到作有王十五司馬弟出郭相訪  
兼遺營茅屋貲作雖稍爲是以破岑寂而要之非其  
好也當時有南隣北隣者其人皆不俗子美南隣詩  
云錦里先生烏角巾園收芋栗不全貧慣看賓客兒  
童喜得食階除烏雀馴秋水纔添四五尺野航恰受  
兩三人白沙翠竹江村暮相送柴門月色新北隣詩  
云明府豈辭滿藏身方告勞青錢買野竹白幘岸江  
皋愛酒晉山簡能詩何水曹時來訪老疾步屨到蓬  
蒿又過南隣朱山人水亭詩云相近竹參差相過人  
不知幽花欹滿樹細水曲通池歸客村非遠殘樽席



更移看君多道氣從此數追隨斯蓋遺世之士忘機  
之侶矣岑參草堂村尋人不遇詩數株谿柳色依依  
深巷斜陽暮鳥飛門前雪滿無人跡應是先生出未  
歸范鎮題曹山人野居詩溪接浣花饒勝致山人高  
隱在其中一江絲竹喧天沸爭及松篁半日風亦皆  
彷彿其幽致也喻汝礪晚泛浣花遂宿草堂詩扣楫  
泛澄虛濯流睇幽芳晚英襯奇樹夕霏媚疎篁歸鳥  
亦斲閒夜魄動初涼忽焉眾星微天高月舒光昔也  
杜陵子澹然此茅堂客至酒自斟句得意已忘云何  
常念饑零落在道旁古來技入神一飽豈屑望吾輩

天所窮慨歌淚霑裳邵博同楊元澈遊草堂詩萬里  
橋西路幽居今尙存共來披草徑遠去問江村冉冉  
花扶屋蕭蕭竹映門斯人隔今古此意與誰論劉望  
之草堂詩風月藏詩骨流離賦病骸不禁一飽死空  
遺百生懷樹秀天通隴山嬌客語淮壁間無半偈無  
乃望君厓捫膝先生又有草堂詩六首栩栩詩翁錦  
里西只緣詩好合窮栖竹鋪冷色雲連寺柳漾輕絲  
鳥過溪凝望不禁關樹暗駐情應恨蜀山低離人苦  
怕春歸盡可忍紅英半着泥又云從教日日敞窓扉  
嫌怕風花入眼遲剩買芒鞋供看竹更乘春雨去栽



蜀中名勝記 卷之二  
橙苦無賓客僧來後薄有生涯鶴下時聞道鄰翁酒  
初熟新筍一酌莫相違又云遠嶼曲洲縱復橫沙邊  
繁鳥弄簫笙一軒簷冷松陰合十里林香藥草生路  
轉斷楂逢石坐風移深竹見僧行晚來冲抱更清曠  
時有幽人帶月耕又云亂後飄零歇此身風光無賴  
更清新客懷易感酒添病詩思苦慳花減春南枝北  
枝鶯舌巧前村後村雨腳勻暫借溪邊老爲客花心  
柳眼莫撩人又云翠木搖艷溪之灣遊子失氣生愁  
酸誇力搏虎筋骨絕雙流迸巘道路難布衾多年窘  
夜雨土銼無火啼夕餐一生忠義老寂寞旋燒竹葉

供春寒又云竹外清疎浸碧溪溪邊竹淡煙雨霏閒  
看雪嶺題詩罷醉向西郊信馬歸霄漢直愁雙闕迥  
夢魂長着五陵飛故園秀木又春色只恐歸去池臺  
非宋京補亡詩云君不見少陵草堂背西郭浣花溪  
水流堂腳竹寒沙白白淒涼莫問四松霜草薄入門  
好在烏皮几老去不歸換鄰里西嶺千秋雪未消舍  
北泥融飛燕子祇今橙木平橋路籠竹和煙雜江霧  
野僧作屋號草堂不是柴門舊時處碑目云益州草  
堂寺列畫前長史一十四人代稱絕迹李文饒跋云  
余嘗於數公子孫之家獲見圖狀乃知草堂繪事靡



不逼真者 方輿勝覽云梵安寺在成都縣南與杜甫草堂相接每歲四月中澣前一日太守宴集于此呂大防建草堂繪少陵像張燾盡取少陵詩勒石刻置焉何宇度益部談資云武侯工部二祠之中有寺一名草堂一名中寺前代爲尼居名桃花寺隋文帝時始易以僧唐大厯中崔甯鎮蜀以冀國夫人任氏本浣花女遂重修之繪夫人真于中會昌亦在毀例夜聞女子啼泣之聲而止宋朝禱雨有驗乃賜名梵安寺也按高僧傳唐僧旭上居草堂寺惟以禪誦爲業蜀土猶尙二月八及四月八日每至二日四方大

集馳騁遊遨旭公獨端坐竹林泊然寂想四象觀之如朝日初出因目之爲旭上云

東門之勝禹廟大慈寺散花樓合江亭薛濤井海雲寺其最著者 張俞上蜀帥書俞再拜世言古之大聖人必曰三皇氏五帝氏犧農在上古其道不可復行故後世唯以堯舜爲法厯百聖人莫之能易而學者遂傳禹尙不及堯舜俞謂堯舜承四聖至治之業在位七十載故能道德行於天地萬物陶乎無爲其後洪水暴九州十有餘年生民流蕩彝倫壞斃堯視天下之溺如己溺焉乃博咨眾工若皋陶之倫咸不



蜀中名勝記 卷之二  
克其事然後舉舜舜亦不能治然後舉禹禹果能治之遂成大功舜有天下乃美禹曰地平天成六府三事允治萬世永賴時乃功是知滔天之害雖堯舜之聖必待禹而治之苟當時不得禹也生民其如何後世其如何愚恐君臣父子不爲魚鼈則九州萬國淪於海矣安有今日之治哉故謂開闢已來羣聖之功唯禹爲大也百川之長有四瀆而江河爲大江出蜀之西徼禹迺生於西羌石紐其地也今淫鬼無名饗蜀民之祀者迨將千百郡縣猶能存之而神禹爲蜀人江漢爲蜀望大功格天地利澤施萬世曾不得享

蜀之祀若一淫鬼斯闕禮之甚者俞嘗恨焉伏惟明公治蜀滔滔江漢盡在土宇宜作禹廟用康斯民昔尹吉甫作詩美申伯則曰王命申伯式是南邦因是謝人以作爾庸又美仲山甫則曰德輶如毛民鮮克舉之維仲山甫舉之言政事甚易而人不能行維仲山甫獨能舉而行之明公有申伯法度南邦之德有仲山甫賦政于外之功蜀人愛戴期乎無窮若禹廟之作乃政之易者衆不能舉明公若能舉之可謂存乎聖而順乎民也豈挾太山超北海之爲力哉俞近述南賓郡修禹廟碑文一首其道備其事直文雖浮



濫理或庶幾方刻石以示後世謹錄一通上獻謂狂夫之言而棄之不敢逃戾若謂斯言可采斯廟可成宜載事于金石則江漢無盡明公之德亦無盡按此禹廟立于成都之始也今在城東北之馬務街歲久傾圯予以萬厯辛亥始克修復仍以蠶叢李冰二神配于東西廡按方輿勝覽蜀王蠶叢氏祠今呼爲青衣神在聖壽寺昔蠶叢氏教人養蠶作金蠶數十家給一蠶後聚而弗給瘞之江上爲蠶墓南史齊永明間始興王蕭鑑爲益州刺史於州園得古冢有金爲蠶數斗鑑一無取復爲起冢立祠又按寰宇記秦李

冰爲蜀郡守有功於民舊祠在府西南三里及唐節帥李德裕重修今蠶叢祠已不存李冰祇李觀察家作宗祠耳會詘時勢不能特舉乃告于神附庸之且以紹禹之績焉 通志云大慈寺唐至德年建舊有肅宗書大聖慈寺四字蓋勅賜也故會昌不在除毀之例碑目云唐僧大辯修功德碑元和十五年立在寺之文殊閣唐韋南康碑二並在寺之資福殿中集古錄云大慈寺資福院記唐李德裕撰長慶二年立成都記云大慈極樂院有至和丙申季春二十八日眉陽蘇軾與弟蘇轍來觀盧楞伽筆迹留題陸游跋



蜀中名勝記 卷之二  
中和院東坡帖云此一卷皆蘇仲虎尙書所藏鑒定  
精審無一帖可疑者刻石在成都大聖慈寺中和勝  
相院淳熙六年六月十七日也成都太守田况三月  
十四日大慈寺建軋元節道場詩赤精流景鑠朱夏  
向清和紺宇修祠盛華封祝慶多簪裳千載遇鐘梵  
五天歌遠俗尤熙泰皇猷信不頗又七月六日晚登  
大慈寺閣觀夜市詩萬里銀潢貫紫虛橋邊螭轡待  
星姝年年巧若從人乞未省靈恩徧得無又七月十  
八日大慈寺觀施孟蘭盆詩飛閣穹隆軼翠煙孟蘭  
盛會眾喧闐且欣酷暑從滋滅漸有涼風快夕眠又

冬至朝拜天慶觀會大慈寺詩景至履佳辰朝祝著  
國令黃宮啟潛萌紫宇晨蔭映陽德比君子吾道實  
可慶矧丁皇運亨遇主堯舜聖坤維最遠方拙者此  
尸政雅俗舊儒文民牒少訟爭幸足宣上恩惟恐罄  
物性良時不易得行樂未爲併高會縱嬉遨豐歲愈  
繁盛與眾助驩欣寄情於俚詠范成大會慶節大慈  
寺茶酒詩霜輝催曉五雲鮮萬國懽呼共一天淡淡  
暖紅旗轉日浮浮寒碧瓦收煙銜盃樂聖千秋節擊  
鼓迎冬大有年忽憶捧觴供玉座不知身在雪山邊  
方輿勝覽云雪錦樓在大慈寺門元宵守帥遊賞



于此李壽十五日同登大慈寺樓得遠字詩重樓得  
雲氣深穩戶牖誰能發關鍵樓下輪蹄渙散馳行人  
一顧不容返好遊獨是我輩閒褰衣直上相推挽層  
軒危檻倚欲遍更假胡床同息偃西南繁會惟此都  
昔號富饒今已損填城華屋故依然孰爲君王愛基  
本茫茫八表聊縱目情知日近長安遠白雲浩蕩飛  
鳥沒玉笙淒涼紅粉晚梁王吹臺得李杜黃公酒壚  
醉稽阮高風千載凜莫攀與世相濁徒混混荷衣蕙  
帶芙蓉裳野服猶堪敵華袞去梯孰復供君謀殺馬  
毀車從此遁勝覽云成都古蠶叢之國其民重蠶事

故一歲之中二月望日鬻花木蠶器號蠶市五月鬻  
香藥號藥市冬月鬻器用者號七寶市俱在大慈寺  
前宋祁大慈寺前蠶市詩蜀雖云樂土民勤過四方  
寸壤不容隙僅能充歲糧閒或容墮爛曷能備凶瘁  
所以農桑具市易時相望野氓集廣鄺眾賈趨寶坊  
惇本誠急務戒其靡愆常茲會良足喜後賢無忽忘  
田况大慈寺前蠶市詩高閣長廊門四開新晴市井  
絕纖埃老農肯信憂民意又見笙歌入寺來 蜀檣  
杙云孟知祥明德元年六月幸大慈寺避暑觀明皇  
僖宗御容已宴羣臣於華嚴閣下孟景廣政元年上



已遊大慈宴從官于玉溪院賦詩通志云解玉溪在華陽大慈寺南韋南康所鑿也溪中細沙可以解玉蘇子瞻集成都玉溪之上有清風閣文慧大師應符所建因爲之記 方輿勝覽云諸葛井在大慈寺西里許自上窺之祇見其三邊更一邊不知其際涯也昔孔明鑿此以通井絡王氣俗傳有人入井聞其中雜聲又云興福寺卽昭覺院相對有天涯石按卽今之寶光寺矣天涯石詳見詩話中 東城樓卽散花樓也李白登錦城散花樓詩日照錦城頭朝光散花樓金牕夾繡戶珠箔懸瓊鈎飛梯綠雲中極目

散我憂暮雨向三峽春江繞雙流今來一登望如上九天遊按輿地紀勝散花樓隋開皇建乃天女散花之處蜀檣杙云孟景有國宮苑城上盡種芙蓉謂左右曰眞錦城也唐武元衡中秋夜錦樓望月分韻詩得東字玉輪初滿空迥出錦城東相向秦樓鏡分飛碣石鴻桂香隨窈窕珠綴隔玲瓏不及前秋見團圓鳳沼中王良會得清字德星搖此夜珥月滿重城香靄煙嵐色飄飄碓杙聲令行秋氣爽樂感素風輕共賞千年聖長歌四海清柳公綽得濃字此夜年年月偏宜此地逢近看江水淺遙辨雪山重萬井金花肅



千林玉露濃不唯樓上思飛蓋亦陪從張正一得蒼  
字高秋今夜月皓皓正蒼蒼遠水澄如練孤鴻迥帶  
霜旅人方積思繁宿稍沉光末濫叨陪賞尤宜清漏  
長徐放得來字玉露中秋夜金波碧落開鵲驚初泛  
濫鴻思共徘徊遠目清光徧高空爽氣來此時陪承  
望更得上燕臺崔備得前字清景同千里寒光盡一  
年竟天多雁過通夕少人眠照別江樓上添愁野帳  
前隋侯恩未報猶有夜珠圓又得秋字四時皆有月  
一夜獨當秋照耀初含露徘徊正滿樓遙連雪山淨  
迥入錦江流願以清光末年年許從遊温庭筠錦城

曲云蜀山攢黛留晴雪蓂笋蕨牙縈九折江風吹巧  
剪霞綃花上千枝杜鵑血杜鵑飛入巖下蓂夜叫思  
歸山月中巴水漾情情不盡文君織得春機紅怨魄  
未歸芳草死江頭學種相思子樹成寄與望鄉人白  
帝荒城五千里張承吉錦城詩錦江城外錦城頭回  
望秦川上軫憂正值血魂來夢裏杜鵑聲在散花樓  
高駢錦城春望詩蜀江波影碧悠悠四望煙花匝郡  
樓不會人家多少錦春來盡挂樹梢頭卓英英錦城  
春望詩和風粧點錦城春細雨如絲壓玉塵漫把詩  
情訪奇景艷花濃酒屬閒人眉娘和云蠶市初開處



處春九衢明艷起香塵世間總有浮華事爭及仙山  
出世人斯二作皆女郎也又顧雲有濯錦江秋澄倒  
碧散花樓晚掛殘紅之句並稱警秀 括地志云  
大江一名汶江西南自温江縣來郫江一名永平江  
西北自新繁縣來昔李冰穿二江城中皆可行舟合  
於城之東南岸曲有合江亭唐符載云一都之奇勝  
也是亭鴻盤如山橫架赤霄廣場在下砥平雲截而  
東南西北寬然矣宋呂大防合江亭記云沱江自岷  
而別張若李冰之守蜀始作堦以犍水而闢溝以醜  
之大溉蜀郡廣漢之田用以富饒今成都二水皆江

沱支流來自西北而匯于府之東南乃所謂二江雙  
流者也沱舊循南湟與江並流以東唐高駢斥廣其  
城遂塞糜棗故瀆始鑿新渠繚出府城之北然猶合  
於舊渚舊渚者合江故亭唐人宴饌之地名士題詩  
往往在焉久弗不治余始命葺之以爲船官治事之  
所俯而觀之滄波修闊渺然數里之遠東山翠麓與  
煙林篁竹列峙于其前鳴瀨抑揚鷗鳥上下商舟漁  
艇錯落游衍春朝秋夕置酒其上亦一府之佳觀也  
按卽今之錦官驛 宋周燾合江亭詩云共思赤脚  
踏層冰聊適江皋興自清昨夜雨聲驅濁暑曉來烟



水快新晴山疑九疊張雲勢灘激千巖落布聲巾履  
從來在邱壑願陪閒日此閒行其二卻暑追隨水上  
亭東郊乘曉戴殘星餘歌咽管來幽浦薄霧疏烟入  
畫舫興發江湖馳象魏情鍾原隰詠飛鶴故溪何日  
垂綸去天末遙岑寸寸青和者爲田望吳棫孫埃諸  
君子惟埃有舊聞蜀地四時雨今快岷山千里晴之  
句可謂得驪珠矣楊甲合江泛舟詩云莫踏街頭塵  
甯飲城東水江頭放船去葦間問漁子岸深魚有家  
鳧鴈在中池得酒可以歌得樹可以艤年年舟中客  
顏色不相似風波無前期遊者亦如此短篙醉時策

遠山醉時几我老不奈醒日落西風起晁公遯合江  
舟中詩云雲氣昏江樹春流汲釣磯何如連夜漲似  
欲送人歸亂石水聲急片帆風力微舟師且停櫓白  
鷺畏人飛白麟合江探梅詩云艇子飄搖喚不回半  
溪清影漾疎梅有人隔岸頻招手和月和霜剪取來  
何耕自合江亭過渡觀趙穆仲園亭詩喚舟芳草渡  
繫馬綠楊陰步入莓苔徑門開花竹林王孫隨蹠遠  
婺女隱雲深想見西南望悠悠空賞心陸務觀有遊  
東郭趙氏園詩清晨呼馬出馭吏請所之錦城浩如  
海我亦無與期有花卽入門莫問主人誰下馬據胡



牀傲睨忘訶譏人言白頭翁胡爲尙兒癡老翁故不  
癡借花發吾詩詩句帶花香東風不敢吹徘徊雙蛺  
蝶許汝鼻端知此二園者亦與錦江相左右也薛  
濤井舊名玉女津在錦江南岸水極清冽濤詩序云  
濤字洪度本長安良家女父鄖因官寓蜀而卒母孀  
居濤及笄以詩聞外又能掃眉塗粉與士族不侔客  
有竊與之燕語時韋中令舉鎮蜀召令侍酒賦詩僚  
佐多士爲之改觀暮歲中令議以校書郎奏請之護  
軍曰不可遂止濤出入幕府自舉至李德裕凡歷事  
十一鎮皆以詩受知其間與濤倡和者元稹白居易

牛僧孺令狐楚裴度嚴綬張籍杜牧劉禹錫吳武陵  
張祐餘皆名士記載凡二十人競有酬和濤僑止百  
花潭躬撰深紅小彩牋裁書供吟獻酬賢傑時謂之  
薛濤牋晚歲居碧雞坊朔吟詩樓偃息于上後段文  
昌再鎮成都太和歲濤卒年七十五文昌爲撰墓誌  
題曰西川校書薛洪度之墓按濤錦江春望詞云花  
開不同賞花落不同悲欲問相思處花開花落時其  
二檻草結同心將以遺知音春愁正斷絕春鳥復哀  
吟其三風花日將老佳期猶渺渺不結同心人空結  
同心草其四那堪花滿枝翻作兩相思玉箸垂朝鏡



春風知不知王建寄之詩云萬里橋邊女校書枇杷  
花裏閉門居掃眉才子知多少管領春風總不如  
海雲山在錦江下流十里有海雲寺鴻慶院諸勝吳  
中復游海雲寺唱和詩王霽序云成都風俗歲以三  
月二十一日遊城東海雲寺摸石於池中以為求子  
之祥太守出郊建高樞鳴笳鼓作馳騎之戲大讌賓  
從以主民樂觀者夾道百重飛蓋蔽山野謹謳嬉笑  
之聲雖田野間如市井其盛如此渤海吳公下車葺  
月簡肅無事從俗高會于海雲酒既中顧謂寮屬曰  
一觴一詠古人之樂事也首作七言詩以寫勝事席

客亦有以詩獻者更相酬和得一十三篇迺命幕下  
吏會稽王霽為之序霽斐薄不能文恐愧勉從公命  
夫俳倡絲竹其樂外也吟咏情性其樂內也充諸內  
則能遺外之樂流於外則內有所喪今公既推內之  
樂以樂賓又盡外之樂以樂民可謂得其樂矣中復  
詩云錦里風光勝別州海雲寺枕碧江頭連郊瑞麥  
青黃秀遶路鳴泉深淺流彩石池邊成故事茂林坡  
上憶前遊綠樽好伴衰翁醉十日殘春不少留范純  
仁和云東郊行樂冠西州古寺峩巒翠嶺頭化俗文  
翁傳愷悌尋山謝傅繼風流天涯樽酒欣相遇劍外



三春得共遊雅興直須窮勝賞年光難使隙駒留韓  
宗道和云茂林修竹翠煙收寺枕清江最上頭好鳥  
啼春知客恨落花浮水近人流政閒不廢登臨賞意  
適真成汗漫遊紫陌紅塵歸路遠夕陽回首重遲留  
勾士良和云佛土依山福遠州春行繡騎上雲頭補  
天彩石盈池在朝海清江繞寺流四國仰煩郇伯勞  
羣生翹望謝安遊早知爲礪爲霖意惟有西民欲暫  
留薛綸和云寺占靈峯更近州喧闐騶從錦纏頭歌  
鐘乍奏晴雷殷戈甲急趨春水流幾處醉眠方枕藉  
一城謠俗重嬉遊賢侯惠意民知否幾刻嚴闔爲爾

留宋祁集海雲鴻慶院詩地勝祠仍古春餘物徧華  
山雲時抱石佛雨不萎花嶺挾樓梯峻巖牽殿城斜  
淙谿雜環珮怪蔓走龍蛇供座僧飛鉢香園客戲沙  
吾遊真草草深意寄烟霞趙抃遊海雲山詩縹緲齊  
雲閣喧闐摸石池物華春已盛人意樂無涯羅綺一  
山徧旌旗十里隨遊棚夾歸路驍騎看星馳蘇案和  
云笙歌揭虛閣帷幕匝春池且與民同樂都忘天一  
涯舊遊嗟倏忽故步喜追隨陌上人如堵歸鞍莫載  
馳那夢臣和云使旌驅近郭民宴列芳池洩洩春臺  
上沉沉暮海涯鴻驚人宛轉電激騎追隨此會經年



至須防日似馳霍交和云山深藏古寺傍枕舊芳池  
鼓響揭雲外石探從水涯使旌遊不倦瑞麥獻相隨  
事簡民同樂歸心莫競馳韓絳遊鴻慶寺詩久旱雨  
初足樂遊春正深喧闐觀士女清曠入山林佛界雲  
成寶僧園地布金方塘探子石高閣會賓簪沙水通  
溪白松筠逐徑陰紛華從滿目幽寂自虛心印組端  
爲累巖扃得暫尋晚風吹綠野歸騎已駸駸吳師孟  
和云十里東郊道茲遊歲月深參僚從大府高會適  
叢林穉子喧沾玉春姬笑予金咳珠僧獲寶醉弁客  
遺簪天賜連宵澤民歡畢晝陰分明造物手自在出

塵心非相雖無住殘芳尙可尋都人望旋旆車馬又  
駸駸范成大十一月海雲賞山茶詩門戶懽呼十里  
村牖前風物已知春兩年池上經行處萬里天邊未  
去人客鬢花身俱歲晚粧光酒色且時新海雲橋下  
溪如鏡休把冠巾照路塵十二月海雲賞山茶詩追  
趁新晴管物華馬蹄鬆快帽簷斜天南牖盡風晞雪  
水下春來水漱沙已報主林催市柳仍從掌故問山  
茶豐年自是驪聲沸更着衙前畫鼓搥喻汝礪遊海  
雲山詩渺渺天宇初便復有此山清晨及茲游遐想  
百代前來者幾何人當時各爲歡淑質揚妙舞哀絃



蜀中名勝記卷之二終  
三  
遞清彈樂事坐如昨芳歲已屢殫向來所游人落葉  
不復還迥然散遠日感之爲長歎竹徑非舊所鵲巢  
豈昔眠念誰當久存而不佳所緣破涕聊一怡山川  
卻萋妍未知後世士誰復當來旋

蜀中名勝記卷之二終

蜀中名勝記卷之三

成都府三

閩中曹學佺能始著

北門之勝武擔山子雲宅金馬祠太立城玉局觀昇  
仙橋萬歲池學射山其最著者 寰宇記云武擔山  
在府城西北一百二十步一名武都山蜀記云武都  
山精化爲女子美而艷蜀王納爲妃不習水土欲去  
王必留之作東平之歌以悅之無幾物故王乃遣五  
丁於武都擔土爲塚蓋地數畝高七丈上有一石厚  
五寸徑五尺瑩徹號曰石鏡王見悲悼遂作與邪之



歌龍歸之曲路史曰開明妃墓今武擔山也有二石  
闕石鏡武陵王蕭紀掘之得玉石棺中美女容貌如  
生體如水掩之而寺其上鏡周三丈五尺杜甫題石  
鏡詩蜀王將此鏡送死置空山冥漠憐香骨提携近  
玉顏眾妃無復歎千騎亦虛還獨有傷心石埋輪月  
宇間按武擔山今在藩司門右首道西卽是祇一坏  
土耳揚子雲賦所謂武擔鎮都刻削成劍王基旣夷  
蜀堠尙叢也昔有呪土寺東西二臺西臺有暑雪軒  
諸勝唐王勃游武擔山序云若夫虎邱仙鎮吳王殉  
歿之墟驪嶠崇基秦帝升遐之宅雖珠衣玉匣下賁

窮泉而廣岫長林終成勝境亦有霍將軍之火隧迴  
寫祁連樗里子之孤墳竟開長樂豈如武擔靈嶽開  
明故地蜀夫人之葬迹任文公之死所岡巒隱隱化  
爲閣岫之峯松栢蒼蒼卽入祗園之樹引星垣於沓  
嶂下布金沙棲日觀于長崖旁臨石鏡瑤臺玉甃尙  
控霞宮寶刹香壇猶分仙闕瑯櫳接映臺凝夢渚之  
雲壁題相輝殿寫長門之月美人虹影下綴虬幡少  
女風吟遙喧鳳鐸羣公以玉津豐暇僚林壑而延情  
錦署多閒想巖泉而結興于是披桂幌歷松扉梵筵  
霞屬禪扃煙敞雞林俊賞蕭蕭鷺嶺之居鹿苑仙談



齊魯龍宮之偈于時金方啟序玉律驚秋朔風四面  
寒雲千里層軒迴雪齊萬物于三休綺席乘雲窮九  
垓于一息碧雞靈宇山川極望石兕長江汀洲在目  
龍鑣翠轄駢闐上路之遊列樹崇闈磊落名都之氣  
眇眇焉洋洋焉信三蜀之奇觀也昔者升高能賦勝  
事仍存登嶽長謠清標未遠敢攀盛組下揆幽襟庶  
旌西土之遊遠嗣東平之唱云爾蘇頌武擔山寺詩  
武擔獨蒼然墳山下玉泉鼈靈時共盡龍女事同遷  
松柏銜哀處幡花種福田詎知留鏡石長與法輪圓  
段文昌題武擔寺西臺詩秋天如鏡空樓閣化玲瓏

水暗餘霞外山明落照中鴈行看漸遠松韻聽難窮  
今日登臨意多歡笑語同姚向和云開閣錦城中餘  
閒訪梵宮九層連晝景萬象寫秋空天半將身到江  
長與海通提携出塵土曾是穆清風温會和云桑門  
煙樹中臺榭造雲空眺聽逢秋興篇辭變國風坐愁  
高鳥起笑指遠人同始愧才情薄躋攀繼運窮楊汝  
士和云清淨此禪宮層臺復倚空偶時三伏外列席  
九霄中平視雲端路高臨樹杪風自憐榮末座前日  
別池籠李敬伯和云台上起涼風乘閒覽歲功自隨  
台席貴盡許羽觴同樓殿斜暉照江山極望通賦詩



思共樂俱得詠時豐姚康和云松逕引清風登台古  
寺中江平沙岸白日下錦川紅疎樹山根淨深雲鳥  
跡窮自慚陪末席便與九霄通薛濤有段相國遊武  
擔寺病不能從題寄云消瘦翻堪見令公落花無那  
恨東風儂心猶道青春在羞看飛蓬石鏡中宋蒲瀛  
游呪土寺西台詩偶到城西寺人言呪土墳夕陽台  
半出秋草徑纔分地下無紅粉天邊有碧雲徘徊追  
往事風急葉紛紛又東臺詩城郭層臺迥祇園細路  
通小亭虛白日老樹足秋風閱世年年改傷心處處  
同黃泉魂在否紅粉亦成空喻汝礪游西台院暑雪

軒觀石鏡詩城中苦伊鬱茲軒獨高騫連蔓動參差  
錯畦橫阡眠雪嶠政孤峙若與我周旋遠翠游蕩漾  
輕鷗下聯軒密竹冒幽逕新蒲澹清漣初游愜餘懷  
旣久幽念攢慨彼泉下人灼灼夸令顏忽焉墮榛莽  
窈窕不可援一鏡空復情況乃塊石頑哀哉彼愚子  
婉變情可牽差勝茂陵公更詠方士言吳棫題暑雪  
軒詩呪土臺頭寺披襟笑語閒千年雲抱石六月雪  
彌山酒熟筍嘗外茶新碾試閒要須石點筆來此賦  
躋攀周燾和云崇台窮石照氣味樂偷閒南陸朱明  
馭西闌白雪山茶甌回舌本塵尾落談閒欲綴風煙



句彌高不可攀田望和云聖福軒重敞偶來心地閒  
因談丁士冢知是武擔山人在水壺裏天垂玉壘閒  
賡歌白雪句巴客強追攀孫竣和云地僻宜避暑官  
卑幸頗閒虛傳力士擔始信蜀妃山嶺雪青霄畔城  
煙密樹間清談容欵接妙句獨難攀王澧和云望處  
疑蓬島天長碧海間雲霞收玉宇煙浪湧銀山茶入  
清談裏風生兩腋間詩成似西嶺高嶮不容攀宋京  
補亡詩云君不見蜀王妃子墓突兀城中若山積墓  
頭寒鏡澁無光妬月欺煙化爲石鴻荒無根憑野史  
直謂山妖化妃子臨終未免懷首邱運土山中葬于

此山名武擔錦江邊用是得名千萬年如今佛閣倚  
空翠老木盤鬱摩蒼天晴雲入穴西山出捲簾坐見  
嵐光滴安得文如汲冢書免使後人疑往昔按唐明  
皇幸蜀從行妃子亦有葬此山者古今集記云望妃  
樓在子城西北隅明皇以如墓在武擔山爲此樓以  
望之 陸游行武擔西南村落有感詩騎馬悠然欲  
斷魂春愁滿眼與誰論市朝遷變歸蕪沒礪谷谿訝  
互吐吞一徑松楠遙見寺數家雞犬自成村最憐高  
冢臨官道細細煙莎遍燒痕註云有大家高數丈傍  
又一家差小莫知何代人也俗號太子墓成都文類



蜀中名勝記 卷之三 五  
云武擔山循城而西有前蜀王光圖墓墓前有永甯  
佛宮王氏拜掃之所多檀木 國志云成都四出大  
道道實二十里有衢今言十八里者昔蜀王女未嫁  
年二十七王哀悼不忍言二十故言十八也王女墓  
在城北今王女陌是也 寰宇記云子雲宅在少城  
西南角一名草玄堂何涉讀易堂記云揚雄有宅一  
區在錦官西郭隘巷著書墨池在焉按今在藩司西  
南隅屬城之北與郡縣俱移來者墨池二字舊是米  
顛書扁刻于石 古今詩話唐馮涓字信之信都人  
大中初舉進士登宏詞科時危隱商山十年昭宗以

爲眉州刺史陳田拒命涓棄郡於成都墨池灌園自  
給唐王勃詩亂竹開三徑飛花滿四鄰從來揚子宅  
別有尙玄人岑參詩吾悲子雲居寂寞人已去娟娟  
西江月猶照草玄處精怪喜無人睢盱藏老樹宋祁  
詩宅廢經池在人亡墨溜乾蟾蜍兼滴破科斗共書  
殘蠹罷芸猶翠蒸餘竹自寒它揚無可問撫物費長  
嘆蒲瀛詩寂寞一區宅沈冥千載豪但輕執戟賤誰  
識草玄高嶼蚪猶翻墨提壺欲載醪著書端有意不  
必反離騷邵博詩自負天人學甘居寂寞濱卻憐載  
酒客似識草玄人三世官應拙一區宅更貧千年尋



蜀中名勝記 卷之三  
故里感涕獨沾巾喻汝礪詩讀書豈不好憂憤還在  
茲書中見古人隱閔惻餘思遇險理有激尋分意多  
隨娟娟感姱容戚戚念幽棲曾是無間然孰爲愜所  
宜覽之不自聊悵然起遙悲宋京補亡詩云君不見  
子雲草立西郭門一逕秋草間朝昏何須筆冢高百  
尺池墨黯黯今猶存童烏侯芭竟零落立學無人終  
寂寞漢家執戟知幾年垂老身投天祿閣俗兒紛紛  
重劉向思苦言艱動嘲謗漢已中天雄亦亡不教空  
文從覆醬如今卻作給孤園吐鳳亭前池水寒安得  
斯人尙可作會有奇字令君看按野客叢談劉棻嘗

從雄學作奇字所謂奇字者古文之變體也自秦漢  
古文有八體一曰大篆二曰小篆三曰刻符四曰蟲  
書五曰摹印六曰署書七曰殳書八曰隸書王莽時  
使甄豐改定古文復有六書一曰古文孔氏壁中書  
也二曰奇字卽古文而異書三曰篆書秦篆書也四  
曰佐書卽隸書也五曰繆篆所以摹印也六曰鳥書  
所以書旛信也袁說友成都文類云益州中興寺內  
有墨池揚子雲讀書處畫像存焉圖經云中興寺有  
子雲載酒亭是 成都記云唐高僧智浩嘗於中興  
寺誦法華經鄰有龍女祠龍每夜聽之一夕施一寶



珠浩曰僧家無用此龍以神力化大圓石榴而去今以水澆之則龍宮石室四字隱隱可見岑參詩龍女何處來來時乘風雨祠堂青林下宛宛如相語蜀人競祈恩捧酒仍擊鼓輿地紀勝云金馬碧雞祠在金馬坊前漢宣帝聞益州有金馬碧雞之神遣諫議大夫王褒持節醮祭而致之宋朝賜爲昭應廟封其神爲靈光侯漢祭金馬碧雞文曰持節使者王褒敬移南崖金精神馬縹縹碧雞處南之荒深溪迥谷非上之鄉歸來歸來漢德無疆廣于唐虞澤配三皇黃龍見兮白虎仁歸來歸來可以爲倫歸兮翔兮何事

南荒也按今北門內石馬巷有石馬足陷入地金馬祠在巷內碧雞坊則在城之西南杜甫詩云時出碧雞坊西郊向草堂是矣古今集記云高駢以成都土惡城歲壞易以磚甃凡負城邱陵悉平之以便農桑訖功筮得大畜之象曰畜者養也濟以剛健篤實輝光日新吉孰大焉文爲以下存上因名太立城詩話總龜載五五復五五五逾重數浮世若浮雲金石一如故與君相見時杳杳非今土右詩見於成都羅城北門壞石上有乾符三年高駢名銜餘字斷缺莫知其爲何詩也成都記高駢展築羅城下令縱民



蜀中名勝記 卷之三  
游觀有孕婦至城北樓免一女駢聞之曰此城他日  
代代客人爲主其後牧守果皆京師所命碑目云高  
駢築城記唐中和四年翰林王徽作在城中信相院  
宋祁題信相院默菴詩對言方有默因默乃名菴菴  
留默不遣一物遂爲三龜掃泥中痕正恐力弗堪自  
問呵默者了然成妄談景文又題北樓詩云少城西  
北之高樓此地蒼茫天意秋驚風白日忽已晚落葉  
長烟相與愁極塞雲物自慘澹趨林鳥雀時啁啾纓  
上朔塵久不洗安得手弄滄江流按今北門謂之大  
安門亦王建武成所命也 華陽國志城北十里昇

仙橋有送客觀司馬相如初入長安題市門曰不乘  
赤車駟馬不過汝下也唐咸通中雲安進士李遠駟  
馬橋賦所謂題記數行寂寥千載者矣按李膺記云  
昇仙水起自始昌堰有兩叉中流卽昇仙成都記云  
城北有昇仙山昇仙水出焉相傳三月三日張伯子  
道成得上帝詔駕赤文于菟於此上昇也岑參昇仙  
橋詩長橋題柱去猶是未達時及乘駟馬車卻從橋  
上歸名共東流水滔滔無盡期羅隱詩危梁枕路歧  
駐馬門前時價自友朋得名因婦女知直須論運命  
不得逞文詞執戟君鄉里榮華竟若爲江遵詩漢朝



蜀中名勝記 卷之三  
九  
卿相盡風雲司馬題橋眾又聞何事不如揚得意解  
搜賢哲薦明君元虞集歸蜀詩云我到成都住五日  
駟馬橋下春水生過江相送荷子意還鄉不留非我  
情鷓鴣輕筏下溪足鸚鵡小窗呼客名賴得郫筒酒  
易醉夜深衝雨漢州城 益州記云昇仙亭夾路有  
二臺一名望鄉臺在縣北九里成都記曰望鄉臺蜀  
王秀所作杜甫詩神交作賦客力盡望鄉台蓋指此  
也昇仙橋北長林蒼翠曲澗潺湲大非人世間境乃  
昭覺禪寺高僧傳云圓悟禪師宏振法席于此臨終  
書偈有萬緣遷變渾閒事五月山房冷似冰之句

李旼昭覺寺紀略唐僖宗幸蜀放隨駕進士三榜題  
名記陳太師塑六祖像蕭相國文建寺碑俱在寺內  
又有孫位張南本畫壁長安頒來昭覺寺額經亂而  
毀范鎮遊昭覺寺詩炎蒸無處避此地忽知寒松砌  
行無際石房禪自安鴛鴦秋沼漲蝙蝠晚庭寬登眺  
見田舍衡茅半不完陸游飯昭覺寺暮歸作云自墮  
黃塵每慨然携兒蕭散亦前緣聊憑方外巾盂淨一  
洗人間七箸癯靜院春風傳浴鼓畫廊晚雨濕茶煙  
潛光寮裏明窗下借我逍遙過十年 方輿勝覽萬  
歲池在府北十里華陽國志張儀築城取土處去城



蜀中名勝記 卷之三  
十里因以養魚謂之萬歲池郡國志云龍壇在萬歲池唐開元中有僧誦法華經感老叟來聽僧問之曰我池中龍也僧曰今方旱何不降雨叟曰凡雨須天符不爾天誅之今當爲師降雨師其葬我是夕大雨質明見池邊大蛇斬而爲兩僧取焚之爲立塔呼龍壇錄異記云成都至真觀道士黎元興龍朔中於學射山創造觀宇夜夢神人引昇高山大殿之中謁見黃老君身長數丈髭鬚皎白戴鳳冠著雲霞衣侍衛十餘人顧謂元興曰吾近有材木可構此觀無煩憂也如此數日有人於萬歲池中乘舟取魚忽見水色

清澈池底大木極多以告元興元興令人取之得烏楊木千餘段至有長百尺者用以起觀作黃老君殿依夢像塑之又制三尊殿下及講堂齋壇房廊門宇皆足用焉盧照隣集云至真觀者隋開皇二年所立有天尊真人石像大小萬餘軀石壇三級週迴百步銅鐘一口重七十斤按至真觀後周所立觀側小蠻橋下掘得古碑云始青之下月與日兩半同升合爲一大如彈丸甘如蜜出彼玉堂入金室子若得之慎勿失此度世古立歌也隋辛德源記畧云前臨逸陌卻負長瀛蕙樓接登景之房瓊台帶盪真之室至今



此觀尚存 通志云成都萬歲池廣袤十里溉三鄉  
田歲久淤澱王剛中知府日集三鄉夫共疏之累土  
爲防上植榆柳表以石柱州人指曰王公之甘棠也  
歲華紀麗稱三月三日張伯子于學射山上升巫覡  
賣符于道遊者佩之以宜蠶辟災太守出遊日晚宴  
于萬歲池唐司空曙晦日益州北池陪宴詩云臨泛  
從公日仙舟翠幕張七橋通碧水雙樹接花塘玉燭  
收寒氣金波隱夕光野間歌管思水靜綺羅香遊騎  
縈林遠飛撓截岸長郊原懷灞滻陂澁寫江黃常侍  
傳花詔偏裨伺羽觴豈令南峴首千載播餘芳宋范

成大上巳日萬歲池坐上呈提刑程詠之云降春酒  
暖絳煙霏漲水天平雪浪遲綠岸翻鷗如北渚紅塵  
躍馬似西池麥苗剪剪嘗新麩梅子雙雙帶折枝試  
比長安水邊景祗無饑客爲題詩 寰宇記云學射  
山一名斛石山在縣北十五里李膺益州記斛石山  
有兩女冢 田况三月三日登學射山詩麗日照芳  
春良會重元巳陽濱修祓除華林程射技所尙或不  
同茲俗亦足喜門外盛車徒山半列鄜市彩棚飛鏑  
遠醉席歌聲起回頭望城郭煙靄相表裏秀色滿郊  
原遙景落川涘目倦意猶遠思餘情未已登高貴能



賦感物暢幽旨宜哉賢大夫由斯見材美趙抃次蘇  
案游學射山詩錦川風俗喜時平上已家家出郡城  
射圃人稠喧畫鼓龍湫波淨照紅旌迎真昔詫登天  
虎命侶今聞出谷鶯勉爲遠民同樂事使臺仍是得  
賢明楊甲寒食遊學射山詩疾風吹沙天茫茫日落  
未落原野黃山空無人石碌碌路長馬饑石齧足荒  
臺古林翳雲族何人刻岳縛層屋當時萬騎填山谷  
至今拾寶多遺鏃故國山川愁遠目人世悲歡風雨  
速凌高舉酒天爲蹙手攀崖岫扣雲木何人唱我淒  
涼曲興亡一眼冥冥綠野水平蕪飛雁鷺范鎮有仲

遠龍圖見邀遊學射詩幾年魂夢寄西州春晚歸逢  
學射遊十里香風塵不動半山晴日雨初收指麾武  
弁呈飛騎次第紅粧數勝籌夾道綺羅瞻望處管絃  
旌旆擁遨頭自註云故事往來皆呈馬騎設射棚眾  
賓皆射遣官妓記籌按學射山者以劉主禪于此學  
射故名蜀檣杙云王衍乾德二年秋北巡后妃出餞  
於昇仙橋于時旌旗戈甲百里不絕判六軍諸衛事  
者宰相王鐸也後主戎裝披金甲珠帽錦袖執弓挾  
矢百姓望之謂如灌口神焉是從來講武備于斯矣  
今爲蜀府墳墓此遊遂絕 志云府北三十里有天



回山揚雄蜀記以杜宇自天而降號曰天墮及立宗幸蜀返蹕之後土人呼曰天回今謂之天回鎮也寰宇記云玉局壇在城北柳堤玉局觀內按今往新繁路自堤上行十二里有賽雲臺足以當之其側仍有一小觀存方輿勝覽道經二十四化上應二十四氣六十甲子分隸之玉局化其一也彭乘玉局記云後漢永壽元年李老君與張道陵至此有局腳玉床自地而出老君昇座爲道陵說南北斗經旣去而座隱地中因成洞穴故以玉局名之雲笈七籤成都玉局化洞門石室昔老君降現之時玉座局腳從地而

湧老君昇座傳道旣去之後座隱地中陷而成穴遂爲深洞與青城第五洞天相連天師以爲玉局上應鬼宿恐開穴通氣不利分野乃刻石以閉之因爲石室高六七尺廣一步中鏤立元之像焉節度使長史章仇兼瓊開元中徧修觀宇崇顯靈迹欲開洞門使人究其深淺發掘之際晴景雷震大風拔木因不敢犯按續博物志玉局觀洞高駢帥蜀時取罪人以繩絆其腰令探淺深繩兩月方絕出青城山洞天觀門矣靈驗記云天寶歲玉局觀前江內往往夜中有光從水而出高七八尺上赤下白其末如煙明皇幸蜀



蜀中名勝記 卷之三  
有人於光處得玉像老君以進高餘一尺天姿瑩潔  
寶相圓明殆非人工所製駕回留鎮太清宮今聖容  
壩是其處也亦名玉女壩與金沙泉古跡連接矣宋  
史祥符七年六月十八日申時玉局化老君洞中忽  
有五色光出見高三尺以來移時方散太守凌策畫  
圖具表以聞趙抃贈玉局李垂應太師詩云坐觀山  
水地幽清恬淡冲虛樂性情跡混光塵宗老氏術通  
仙俗似君平欣逢真侶論根本恥向權門叩利名濟  
世金丹得傳授先生高隱在青城司馬光送羅郎中  
登管勾玉局觀詩官名爲玉局已與俗塵疎鐘出寒

松迥香凝古殿虛鄉閭非甚遠俸祿豈無餘誰道神  
仙樂神仙恐不如范鎮送羅勝卿同年提舉玉局觀  
詩匹馬西歸去知君得意偏人情重鄉里官職更神  
仙曉後無衙喏旬頭有俸錢何須駕白鶴辛苦上青  
天宋京補亡詩云君不見青陽老人飛下天口宣至  
道朝羣仙地中神仙捧玉局異事祕恠于今傳龜城  
坤隅地有穴俗說西與岷山連嵯峨古觀森偉像老  
栢慘澹含風煙令威已去城郭在人物自改名依然  
亳州宮庭煥星斗真皇行幸祥符年所託得地近京  
邑此獨隱晦遐方偏安得老人洗此心還我澹泊同



古先蘇軾送戴蒙赴成都玉局觀詩拾遺被酒行歌  
處野梅官柳西郊路聞道華陽版籍中至今尚有城  
南杜我欲歸尋萬里橋水花風葉暮蕭蕭芋魁徑尺  
誰能盡榿木三年已足燒百歲風光定何有羨君今  
作峩眉叟縱未家生執戟郎也應世出埋輪守莫欺  
老病未歸身玉局他年第幾人會待子猷清興發還  
須雪夜去尋君按子瞻自昌化軍貶所移廉州又移  
舒州乃敕提舉成都玉局觀他年老馬之讖竟驗然  
有謝表未赴

蜀中名勝記卷之三終



